

26/06/2001

Kerajaan sedia bantu bekas polis, tentera ceburi perniagaan

BANGI, Isnin - Kerajaan bersedia memberi latihan kemahiran kepada orang Melayu, termasuk pesara polis dan tentera, supaya dapat menceburi bidang perniagaan atau bekerja dalam bidang baru bagi meningkatkan pendapatan.

Datuk Seri Dr Mahathir Mohamad berkata, bekas polis dan tentera perlu sanggup bekerja mencari pendapatan dan bukan bergantung kepada pencen yang diberikan kerajaan semata-mata.

Perdana Menteri berkata, kerajaan akan memberi latihan termasuk bidang teknologi maklumat (IT) jika mereka sanggup belajar dan kemudian bekerja atau berniaga untuk menambah pendapatan.

"Percayalah, kalau dapat kenaikan pencen pun, kita tak dapat beli rumah batu," katanya berucap pada perjumpaan ahli Persatuan Bekas Tentera Malaysia (PBTM) dan Persatuan Bekas-Bekas Polis Malaysia (PBPM) di Universiti Tenaga Nasional (Uniten) di sini, petang ini.

Hadir sama, Ketua Pengarah Bahagian Keselamatan Negara, Datuk Jaafar Ismail; Presiden PBTM, Senator Datuk Muhammad Abdul Ghani, dan Presiden PBPM, Datuk Mansor Jaafar. Majlis itu juga disertai kira-kira 3,000 bekas polis dan tentera.

Sementara itu, Dr Mahathir berkata, orang Melayu juga harus mengubah sikap dan sanggup berusaha mencari pendapatan sendiri dan bukan sekadar mengharap bantuan terus kerajaan.

"Kerajaan bersedia menolong sesiapa saja yang nak memajukan diri. Saya nak tengok orang Melayu boleh membeli rumah yang dibina," katanya yang sedih melihat orang Melayu tidak mampu memiliki perniagaan dan hartanah dalam bandar baru yang dibangunkan di seluruh negara.

Beliau berkata, keadaan ini jika dibiarkan berlarutan akan menyebabkan pola kependudukan di bandar baru tidak mencerminkan keadaan sebenar masyarakat majmuk di Malaysia.

Dr Mahathir juga berkata, negara tidak pernah melupakan pengorbanan anggota polis dan tentera memastikan keamanan negara sehingga kerajaan mampu membawa pembangunan kepada rakyat.

"Negara banyak berhutang budi kepada polis dan tentera. Jika tidak kerana kesanggupan mereka untuk menjalankan tugas dengan disiplin menjaga keamanan, negara kita tidak mungkin mencapai kemajuan seperti sekarang," katanya.

Bagaimanapun, Dr Mahathir berkata, malangnya, ada golongan muda mengecam anggota pasukan keselamatan, kononnya bertindak ganas terhadap rakyat apabila menyuraikan demonstrasi haram.

"Siapakah yang ganas, polis atau mereka," katanya.

Menyentuh tuntutan kenaikan pencen bekas polis dan tentera, Perdana Menteri berkata kerajaan sedia menimbangkan permintaan itu tetapi ia perlulah bersesuaian kemampuan kewangan negara.

Pada majlis itu, bekas polis dan tentera menyatakan sokongan kepada kepimpinan Dr Mahathir dan menawarkan diri untuk mempertahankan negara jika keadaan memerlukan.

Ikrar itu diberikan PBTM dan PBPM yang mewakili kira-kira 300,000 bekas polis dan tentera.

Presiden PBPM, Datuk Mansor Abdul Jaafar, berkata walaupun ahlinya tidak lagi berkhidmat secara aktif, mereka bersedia mengekalkan keamanan negara.

"Kami bersedia untuk dikerah...Kami adalah jenis Melayu yang tidak lupa, bukan daripada kalangan haprak," katanya.

Presiden PBTM, Senator Datuk Muhammad Abdul Ghani berkata, ahli persatuan

akan terus menyokong kepemimpinan Dr Mahathir supaya agenda pembangunan negara diteruskan.

"Kami akan terus berdiri di depan, belakang, kiri dan kanan Perdana Menteri supaya tidak digugat," katanya.

(END)